



TALOFA LAVA!

I le Suafa o Iesu Keriso le Ao o le Ekalesia, e faatalofa atu ai i le au faitau o lenei lomiga o le Maluapapa.

Ae mua pea le viiga i le Atua ona o le mana o lona Agaga o taitaina ai lana Ekalesia. O lea ua fue fai mai le Ekalesia Faapotopotoga Kerisiano Samoa i lona Laumua sei toe tali le faamalosi mai o le Agaga o le Atua.

Ao liuliu totoa finagalo ma saili tofa le Ekalesia i lana Fonotele, e ao pea ona momoli le faamalo i le Taitaifono ma le Laulau o le Fonotele. Se faamalo tauasa i le Komiti o Toeaina; se faamalo taupati i le nofo-a-Komiti; ma se faamalo faatoatoa i Usufono filifilia. Faafetai i le soifua ma le ola. Tau ia ina ou faailo nai pine o lenei Fonotele mo le Kolisi Faafaifeau.

Ua mataina i lenei Fonotele le Faauuina o Reupena Maulolo o le Faiaoga o le Kolisi, ma lona faletua o Fuarosa e avea ma Faifeau Samoa (FS).

Ua pine foi i lenei Fonotele le viiga o le Atua, ina ua patipatia



Susuga Ma'afala Limā FS
Pule o le Kolisi

e le Fonotele le faaecaina o nisi o Tama o le Kolisi ua 'Tautai ae' a latou faa-tamasoaliiga i le galuega a le Atua: Kerisiano Soti (FT), sa Taitaifono i le Komiti o Malua, ma le Faletua ia Laumata; Tavita Roma (FT), Taitaifono o le Fonotele, sui o le Komiti o Malua, ma le Faletua ia Tailua; Iosia Evile (FT), Toeaina Faatonu Matagaluega Hawaii, sui ole Komiti o Malua, ma le Faletua ia Orepa. Ua faamalo fai o le faiva!

Ua afea foi e lenei Lomiga le loto faafetai ma le faagaetia,

ona o Tama sa iloga foi la latou auaunaga i le Kolisi Faafaifeau nei: Susuga i le alii Polofesa Otele Perelini (FS) ma le Faletua ia Julie, sa tutu i le foe ma uli le sa o le Kolisi i tausaga e tele. Ia viia le Atua ona o lo oulua soifua auauna. Peteru Tone (FT) ma le Faletua ia Jane; Iupeli Ieremia ma le Faletua ia Toatolu, sa muai auauna i le galuega Faa-faiaoga i Malua, ona muliai ai lea i le galuega tausinu.

Ua faafetai! Ua faafetai! Ua malie mata i vaai. Aua o lo outou soifua auauna sa tauivi ai i le filiga ma le onosai faapalepale o 'vaaiga ia o le Agaga o le Atua'

Ae muli'ai i le faafetai i le susuga i le Faifeau Faiaoga Dr. Peletisala Limā ma le faletua ia Michiko, i lo la sao tāua a'o galulue ai i le Kolisi. Ia faamanuia tele le Atua.

Ia manuia taualumaga o le Fonotele a le Ekalesia Faapotopotoga Kerisiano Samoa; manuia foi lau faitau ma lau silasila.

Ma'afala Limā
PULE KOLISI MALUA

SILASILA I TOTONU

Talofa Lava! - Susuga Rev Ma'afala Limā FS	1	Kerisiano & Laumata Soti & Maumaga	8
Amatalia Galuega & Faiaoga Fou & Resitala SQA	2	Burglary & Maota Fou	9
Faamavaega—Peletisala Limā & Aiga	3	Faamuli Eseta & Mafutaga Tina	10
Faauuga Faifeau Samoa 2016	4	Motu le pa ua iloa	11
Tautai A'e — Faifeau Malolo	5	Vaaga Eseeese i le Kolisi & Fono Tele 2016	12–13
Bible School & Malua Journal	6	Ripoti	14–15
Malua Study Center	7	Taaloga Taga Polo 2016	16

Amatalia Galuega a le Kolisi 2016



Susuga Karanita & Elena

O le Aso Lulu, 3 Febuari, 2016 i le itula e 7.00pm na faia ai le sauniga e tatala aloa'ia ai galuega o le tausaga, ma fa'aofiaina ai le vasega ulufale o a'oa'o ma o latou faletua, fa'atasi ai ma faia'oga fou e to'alua mo le galuega i le Kolisi. O i la'ua ia o Apela Ah Him ma le faletua ia Foketi; ma Karanita Petaia ma le faletua o Elena. O i laua ia ua maua o la fa'aailoga o le Master of Theology mai le Kolisi Fa'afaife'au o le Pasefika (PTC) i Fiti, i lalo o le polokalame sikolasipi a le Ekalesia. O lea sauniga na faia lava i le maota tapua'i o le Kolisi.

Taitai o le Sauniga: Susuga Kerisiano Soti FT (Taitaifono Komiti o Malua) Faitau Tusi Paia & Tatalo: Susuga Tunumoso Iosia FT (Failautusi Komiti o Malua). O le tusi faitau ma le manatu autu o lea sauniga, o le fa'asinoga mai le Tusi Faitau Aso a le Ekalesia: Teuteronomi 5:12-15 "E le o au o se masini" (*I am not a machine*).

Na avea le a'ao fa'atalofa o i latou nei, e fai ma sui o le Komiti o Malua e talia aloa'ia ai faia'oga fou i le galuega: Kerisiano Soti FT, Tunumoso Iosia FT, Ta'uti'aga Senara FT, Eti Tamati FT, Taeipo Malifa FT, Tavita Anesone FT, ma Ma'afala Limā FS (Pule Kolisi Fa'afaifeau Malua).

Na fa'ai'u lenei sauniga i se taumafataga i le Fale Mafutaga na saunia e le Kolisi i Malua. Na tauaaoina ai foi e faiaoga fou nai meaalofa mo le mamalu sa auai. Ona lulu aao ai lea ma faatofa.

Faiaoga Fou



Susuga Karanita & Elena Petaia

O le susuga ia Karanita Petaia ma le faletua ia Elena, na faauuina i le faaailoga o le Master of Theology (Distinction). Ma o loo galulue nei i laua i le Kolisi i Malua i lalo o le Matagaluega o le Feagaiga Fou.

Ua faaopoopo mai foi le susuga ia Apela Ah Him ma le faletua ia Foketi, ina ua maea ona faauuina i le faaailoga o le Master of Theology, ma o loo galulue nei i laua i le Aoga Tusi Paia (Malua Bible School), i lalo foi o le Matagaluega o le Feagaiga Fou.



Susuga Apela & Foketi Ah Him



Susuga Seumaninoa & Neda Puaina

O le fonotaga a le Komiti o Malua ia Mati 2016, na talia ai le susuga ia Seumaninoa Puaina ma le faletua ia Neda e faaopoopo i le aufaigaluega faiaoga a le Kolisi. I le aso 12 o Me 2016 na faauuina ai Seumaninoa i lona faaailoga o le Doctor of Philosophy (PhD) i le Biblical Studies (New Testament) mai le Aoga Mauauga o Berkley Graduate Theological Union i Kalefonia, Amerika. O le a amatalia le auunaga a Seumaninoa ma Neda i le Kolisi i Malua i le kuata lua, i lalo foi o le Matagaluega o le Feagaiga Fou.

Resitalaina o le Kolisi i le SQA

I le tulafono faatonutonu o le Pulega o Faailoga ma Tusi Pasi Taualoa a Samoa 2010 ua faatulaga mai ai le tataua ona lesitala uma aoga faaaau, e aofia ai le Kolisi Faafaifeau ma le Aoga Tusi Paia i Malua, ina ia mautinoa e le Pulega o loo lelei le auunaga tau aoga o loo tuuina atu e aoga faaaau.

I lalo o le tulafono pei ona taua i luga, e tataua ai i le Kolisi Faafaifeau i Malua ma le Aoga Tusi Paia i Malua ona lesitala ana polokalame uma i le Pulega. Ua maea ona lesitala polokalame e lua a le Aoga Tusi Paia i Malua mo lenei tausaga. O polokalame e lua: o le Tusi Pasi ma le Tipiloma i Aoga Faa-le-Mataupu Silisili.

O loo faagasolo pea vaega manaomia mo le lesitalaina o le Kolisi Faafaifeau ina ia tusa ma le tulafono. E tolu polokalame a le Kolisi: Diploma of Theology, Bachelor of Theology, ma le Bachelor of Divinity. O polokalame foi ia ua maea ona lesitala ma faamautuina i le Sosaiete o Aoga Faafaifeau a le Pasefika (SPATS) pei ona sau ai mai tausaga e tele. A ua a'e se tofa i le Alii Pule ma Faiaoga ina ia faamalie pea le tulafono a le malo o Samoa pei ona faatulagaina. O le faamoemoe a maea le laasaga muamua lea i le lesitala, ona agai lea i le faamautuina (accredit) o polokalame uma i aiaiga faataatitia a le Pulega ina ia o gatasi ai pea ma le tulafono.

Faamavae le Kolisi ma Dr.Peletisala Limā & Michiko & Fanau

O lagona o le fiafia ma le faafetai, a o le faanoanoa foi na saunoa i ai le susuga ia Peletisala, ina ua faamavae aloaia atu i ai le Alii Pule ma le faletua ia Lalokava, faapea le Kolisi, i se aiga faa-le-aiga, sa faatinoina i le po o le aso Tofi, 28 Aperila. O le fiafia ma le faafetai, ona o le faaaogaina pea o le soifua ma le malosi i le isi lea laasaga taua o le soifua valaauina, e ala i le galuega faa-tausi nuu, i le EFKS Fairfield, Sini, Ausetalia. O le faanoanoa ona o le mafutaga mafana ma le Kolisi o le a motusia.

Sa taitaiina e le Alii Pule le sauniga lotu i lea afiafi ma saunoa faalaeiau mo le uso ma le faletua, i le galuega o le a galulue ai. O le faamamafa o saunoaga faamalosia i lea po; "Ia ma'a'a o oulua loto i le galuega." Na talia foi ma le loto faafetai e Peletisala ma le aiga, se meaalofo faatauavaa mai le Alii Pule, faiaoga ma a'oa'o, faapea le mafutaga a tina, e fesoasoani mo le tapena atu i le galuega.

O le susuga ia Peletisala ma le faletua ia Michiko ma le nofo a alo, ua lua sefulu nei tausaga, talu ona ulufale mai i Malua. Sa faapea foi ona galulue faa-

faiaoga, i le Matagaluega o le Mataupu Silisili. O Peletisala foi sa avea ma Taitaifono o le Komiti o le Malua Journal, Komiti o Suesuega Tusitusia a a'oa'o (Thesis Coordinator), Komiti o Taaloga a'oa'o ma le Tabata Instructor. O le faletua ia Michiko o le loia a le Ekalesia Aoao, faiaoga i le Matagaluega o le Mataupu Silisili, faiaoga Aso Sa, faapea ona tiute tauave i totonu o le mafutaga a tina.

O le a misia e le Alii Pule ma le faletua, faapea le Kolisi ia agavaa eseese ma le tamaoaiga sa la faasoa mai, ma e talitonu le taofi, amuia Fairfield!!!! O moomooga alofa ma faamanuiaga mo le galuega mai le Alii Pule ma le faletua, Sui Pule ma le faletua, le aiga faiaoga ma faletua ma le Kolisi atoa. Ia alofagia e le Atua le faamoemoe.

PS. Faafetai mo le tali sapaia o le au uso o le a gasolo ma asiasi atu....G'Day Mate!!!!



FAAUUINA TOFIGA O FAIFEAU SAMOA (FS)

O le viiga e foi lava i le Atua soifua. O le lagona lea a o faaee aao o Tama o le Ekalesia ma saunoa i upu faamanuia mo le aufaigaluega ma faletua, ina ua avea ma Faifeau Samoa (FS). O se laasaga taua ua mafai ai ona taitai sauniga taua a le EFKS, o le Faamanatuga ma le Papatisoga. Na lagona le fiasia ina ua tau lau o le faamoemoe sa tulimatai i le lua tausaga sa galulue ai mo le Ekalesia. E momoli atu ai le faamalo ma le faafetai i le soifua tauivi ma le onosai o lea ua tau i manu le faamoemoe. Ia faamanuia tele le Atua.

Mo le Kolisi FaaFaifeau i Malua, o le susuga ia Reupena Maulolo ma le faletua ia Fuarosa ua faamanuiaina i lea tofiga o le Faifeau Samoa. O Reupena ua tolu nei tausaga o galue faafaiaoga i le Kolisi, i le Matagaluega o le Faiva Alofilima o le Mataupu Silisili. O le faletua ia Fuarosa o loo galue nei o le Administration Officer i le faalapotopotoga tumaoti o le SUNGO. Malo le tauivi, malo le galulue.

O i latou ua faauuina i lenei tausaga ma Ekalesia/ Matagaluega o loo galulue ai;

Andrew & Faleupolu Laufiso (Aoga Kerisiano/Faleata), Faataualofa & Miriama Taefu (Asaga/Faasaleleaga), Fala & Ane Tusa Nila (Atinae/Falealili Sisifo), Falani &

Paono Tofilau (Quakers Hill/Niusaelese), Fetuliaina & Fusi Pama (Kingsland/Aukilani), Iakopo & Pele Manutai (Misionare Rotorua/Manukau), Isamaeli & Aliitasi Aula'i (Aoga Kerisiano/Lotofaga-Lepa-Aleipata), Mofate & Aliitasi Fuimaono (Misionare Rockdale/Niusaelese), Pasefika & Talalelei Maiava (Misionare Mascot/Niusaelese), Pati & Aiga Crichton (EFKS TV/Faleata), **Reupena & Fuarosa Maulolo (Kolisi Faafaifeau Malua)**, Ropati & Nuutofi Toleafoa (Kolisi Leulumoega/Faasaleleaga), Seilala & Agape Luamanuvae (Faleata), Seti & Vaialisi Seti (Saleimoa/Aana), Sili & Logola Mo'a (Forest Lakes/Kuiniselani), Tafatolu & Merina Lelevaga (Kolisi Maluafoa/Faleata), Tavita & Cynthia Faletagaloa (Modesto/Amerika), Elisaia & Sauluma Tagiilima (Alaska/Amerika).



Reupena & Fuarosa Maulolo



TAUTAI A'E

“Tautai a’e”; O le lagona o le faafetai ma le faamalo lea i susuga i Toeaina Faatonu, Toeaina, faapea le lavalaoa o le nofo a Faafeagaiga ina ua a’e manuia le faatautaiga faa-le-agaga sa fitaituga ai. O upu lava a le Tusi, “Auauna lelei e ma le faamaoni, ulufale maia i le fiafia o lou Alii.” Sa latou asaina fita ma lugaluga o le mau luitau o le galuega i le tele o tausaga, a o lenei ua a’e manuia ona o le alofa ma le agalelei o le Atua soifua. O le faafetai fai faatasi a le Ekalesia Faapotopotoga Kerisiano Samoa i le Atua, ona o lo latou sao taua ma le aoga i le faatonufoalauina o le sa o le Ekalesia e ala i tomai ma agavaa, aua o meaalofo ia mai le Atua ua foaina ia i latou aua lana Talalelei. Ia manuia tele le aga atu i le malologa, ma ia utupupuina pea lo latou soifua e le Atua i ona manuia i le tino, mafau, ae sili le agaga. Ia faaaogaina pea lo latou silafia ma taleni e faufautua ai i le aufaigaluega o loo galulue pea, aua se manuia o le Ekalesia Aoa nei ma a taeao. O le aufaigaluega ua avea ma Faifeau Penisione Malolo i lenei tausaga; Tavita Roma FT & Tailua (Faasaleleaga), Kerisiano Soti FT & Laumata (Apia), Iosia Evile FT & Orepa (Hawaii), Solomona Tuatagaloa FT & Annedy (Faasaleleaga), Peteru Tone FT & Jane (Apia i Sasa’e), Iupeli Ieremia FS & Toatolu (Apia i Sasa’e), Otele Perelini FS & Julie (Faleata), Afa Afato FS & Iutita (Misionare Fiti/A’ana).



**Tavita Roma FT ma le faletua ia
Tailua
Ekalesia i Salailua
Matagaluega Faasaleleaga**



**Kerisiano Soti FT ma le faletua ia
Laumata
Ekalesia i Sogi
Matagaluega Apia**



**Iosia Evile FT ma le faletua ia
Orepa
Ekalesia i Mililani
Matagaluega Hawaii**



**Solomona Tuatagaloa FT ma le faletua ia
Annedy
Ekalesia i Lalomalava
Matagaluega Faasaleleaga**



**Peteru Tone FT ma le faletua ia
Jane
Ekalesia i Vaivase Tai
Matagaluega Apia Sasa’e**



**Iupeli Ieremia FS ma le faletua ia Toatolu
Ekalesia i Fagalii
Matagaluega Apia Sasa’e**



**Pro. Otele Perelini FS ma le faletua ia
Julie
Matagaluega Faleata**



**Afa Afato FS ma le faletua ia
Iutita
Ekalesia i Suva, Fiti
Matagaluega A’ana**

BIBLE SCHOOL

AOGA TUSI PAIA MALUA: GALUEGA I SAVAI

Faatalofa atu i le suafa manumalo o Iesu Keriso, le Ao o le Ekalesia. Faafetai i le alofa o le Atua ua mafua ai ona faagasolo ma le manuia fuafuaga a le Aoga Tusi Paia Malua i lenei vaitau o le tausaga.

E tusa ai ma le finagalo o le Komiti Faafoe o le Kolisi i Malua ma le Aoga Tusi Paia, ua faalauteleina nei le auunaga a le Aoga Tusi Paia Malua ua le gata i vasega i Apia nei, a ua faapena i Savaii. O le Aso Faraile 19 Fepuari 2016 sa tatala aloaia ai lea lala o le Aoga Tusi Paia i Salelologa i le faleaoga o le Matata Eese a le Ekalesia i Salelologa lava. O le Sooupu o le Aoga Tusi Paia ia Siu Vaifale sa ia taitaia le sauniga puupuu e amatalia a'i lea faamoemoe taua. O le viiga e 92 sa amata a'i ma sa faitauina le Tusi Paia, Faataoto 2:10 & 11 ma faamamafa ai upu e faapea, "A o'o le poto i lou loto, ma ua malie ia te oe le atamai, e faafeao le mafaufau ia te oe, e leoleo ia te oe le faautauta." Sa faai'u i talosaga sa talosia ai le faamoemoe ua tatalaina i lea aso. E toa 50 le mamalu o le Ekalesia e na auai atu e molimauina le amataga o lea faamoemoe, ma fia aoaoina ai. O le 95% o i latou ia o Alii ae 5% Tina ma tamaitai. Ina ua mae'a lea ona faalauiloa lea o Faiaoga e to'a 5 o e o le a nafa ma vasega i lenei Kuata 1, ma faagasolo ai loa vasega.

Ua malolo nei le Aoga Tusi Paia i le taimi o le Fonotele a le Ekalesia ina ua mae'a ana suega o le Kuata 1, sa feagai ai i le vaiaso ua tuana'i. O le a toe a'e le Aoga i Upolu i le Aso Gafua 30 Me i Apia nei, a o le Aso Faraile Iuni 3, e a'e ai Savaii.

E avea ai foi lenei avanoa e faafetai tele atu ai i le mamalu o le Ekalesia o loo agalelei ane mo le tausiga o le Au Faigaluega i vaiaso uma na autovaa atu ai i Salafai. Silafia e le Atua lo matou agaga faamaualaloina ona o le maua o la outou faaaloalo. Faamanuia tele le Atua i lo outou agalelei ona o le au faigaluega fegasoloa'i.

Ma le Faaaloalo tele,

Siu Vaifale (Sooupu Aoga Tusi Paia)

Malua Journal

O nisi o tusitusiga poo su'esu'ega a Faiaoga o le Kolisi i totonu o lenei tusi, sa faalauiloaina i le Mafuta-ga Faafouina a Faifeau ma A'oa'o tausi nuu i le tausaga e 2015. O loo aofia ai foi ma le pepa a le susuga i le Faife'au Faiaoga ia Makesi Neemia sa faia i le FonoTele, 2015, faatasi ai ma nisi o pepa a le aufaigaluega sa faia i le fonotaga a le Oceania Biblical Studies Association (OBSA) i le Kolisi o Piula, 2015.

Talosia ia ia avea lenei tusi, e ui o se auunaga faatauva a lau Kolisi Faa-Faife'au, e fai ma fesoasoani aoga i le soifua sailiili o le fanau a le Atua, i le Talalelei o le Faaolataga ia Iesu Keriso.

Malua Journal 2016 – Fa'ata'otoga o nisi Matā'upu:


The ger In The Priestly Writings: A Samoan Biblical Hermeneutic
Makesi Neemia FS

Avea Ma So'o I Le Lotoifale: O Ia Lava Na Na Aveina O Tatou Vaivai, Ma Na Tauave O Tatou Ma'i (Mt 8:17)
Dr. Vaitusi Nofoaiga FS

O Lagi Fou Ma Le Lalolagi Fou: O Se Va'aiga Fa'a-Mata'upu Silisili Fa'a-Si'osi'omaga
Dr. Taipisia Leilua FS

O le Galuega Tala'i A Misionare Ma Faletua Samoa I Vanuatu, Laoiti Ma Niu Kaletonia
Latu Latai FS

E 'Ese Le Matua I Le Usoga, 'Ese Le Matua I Tofiga O Le Mavaega, O Le Fa'amanuiaga, O Tofiga Ma Le Valoa'ga A Iakopo I Lana Fanau (Kenese 49)
Dr. Tavita Maliko FS



Malua Study Center

O se tasi lava o polokalame a'oga mo ālo ma fanau a Malua - o le Study Center, lea na amatalia i le tausaga na te'a nei, 2015. E tusa ma le 50 tamaiti na amata ai lea polokalame, a'o lenei tausaga, 2016, ua fa'atuputupula'ia lea aofa'i i le 70 tamaiti i le kuata muamua lenei.

O se tulaga lelei na molimauina i le 2015 i taumafaiga o le fanau sa iai aemaise lava i tamaiti mātutua o le Tausaga 12 ma le Tausaga 13. O tamaiti uma na i le Tausaga 12 na ausia maka e i le va o le 70-85% i le School Certificate (SC). O tamaiti sa i le Tausaga 13 na ofi uma atu i le Tausaga Fa'avae (UPY) a le Iunivesite Aoao o Samoa (NUS) ina ua faamanuiaina a latou su'ega o le Samoa Secondary Leavers Certificate (SSLC).

O se tulaga fa'amanuiaina tele o lo o iai fanau Malua ona o le to'atele o a'oa'o ma faletua e agava'a mo le fesoasoani ai ia latou meaa'oga i le Study Center. O le toatele o faia'oga ma faletua aemaise a'oa'o ma faletua o lo o umia fa'aailoga talafeagai mo matā'upu o lo o fia maua ai le fesoasoani. O lenei tausaga, na amatalia ai vasega i mataupu o le Gagana Peretania (Tausaga 11, 12, 13 ma le Foundation Year), Matematika (Tausaga 11, 12, ma le 13), Economics ma le Accounting (Tausaga 12 ma le 13). E ui ina fa'atoa amatalia lea vaega o le Study Center ae ua molimauina lava le tele o le fesoasoani mo sauniuniga a fanau ia latou su'ega ma meaa'oga o lo o faia i le taimi nei.

Na iloa le aoga o lenei Study Center i a'oa'oga a le fanau ina ua manuia nisi sa tauva fa'ale-mafaufau i tauvaga a tamaiti a'oga o lenei vaega o le tausaga. O se tasi la o ia tauvaga, na manumalo ai le tama'ita'i o Aunoa Uele (o le alo o Iese ma Siaea Uele) i le tauvaga tusigatala a le *New Zealand High Commission ANZAC Essay Competition* (25.04.16). O le tala na tusia e Aunoa na fa'aulutalaina; *What the sacrifices made by the Samoan and Allied servicemen and women during the First World War mean to me*. Ua lē mafai ona fa'aailoa atu le tala atoa ae ua na o se vaega mo le silafia.

It is certain that time will not heal all the broken hearts of the families of fallen servicemen and women. However, this essay has allowed me to evaluate their sacrifices and what it means to me. It has given me a greater insight of the true essence of such sacrifices and the greater need as a youth of today to ensure that lessons we learn is a platform to guide the actions we should take to succeed and maintain peace and harmony in this world.

Ua fa'amanuiaina nei Aunoa i se faigamalaga i le a'ai o Pale i Farani. Ua fai lenei fa'amanuiaga ma fa'amalosia'au i alo ma fanau o le Study Center e atili galulue fa'amaoni ai ia latou meaa'oga ma sa'ili fesoasoani i faia'oga o le Study Center.

O lenei polokalame tāua, o lo o lagolagoina malosia e le Susuga i le Alii Pule ma lona Faletua, le Kolisi atoa i susuga i faia'oga ma faletua faapea ai ma a'oa'o ma faletua. O le fa'amoemoe laualuga lava ina ia maua e alo ma fanau se fesoasoani i ā latou meaa'oga a'o iai i totonu o Malua nei. O le polokalame o le Study Center ua ō fa'atasi ai lava le fa'amalosia o le a'oa'o oina o fanau i le poto salalau ma latou polokalame faale-a'oga Aso Sa e pei ona masani ai.

Avea ai foi lenei avanoa e momoli ai le fa'afetai tele i le Susuga i le Ali'i Pule ma le Faletua, faapea le Kolisi i Malua nei mo le lagolagoina o lenei fa'amoemoe tāua mo nai a tatou fanau. Ae le fa'aititia foi le fa'amalo i nai fanau mo le fa'aaogaina lelei o le Study Center mo ā latou meaa'oga.

Ma le fa'aaloalo tele, manuia le Fonotele a le Ekalesia.



New Zealand High Commission
ANZAC Essay Competition
Winner Aunoa Uele

Mafuta Kerisiano & Laumata Soti ma le Kolisi



O le Aso Sa 13 o Mati sa avea le afioga i le taitaifono o le Komiti o Malua, le susuga i le toeaina faatonu ia Kerisiano Soti ma taitai o le sauniga lotu i le taeao i le malumalu tapuai a le Kolisi. O se avanoa lelei lea mo Soti e saunoa ai mo ni upu tima'i ma upu faamalosi 'au mo le Kolisi ao le'i penesione i lenei tausaga e pei ona fuafuaina. O se tasi foi o Tamā ma Tinā ua loa lo la soifua tautua mo le Ekalesia ma le galuega a le Atua. O se fiafiaga tele i lenei aso mo le susuga i le Alii Pule ma le Kolisi, e le gata i le upu folafola ma talosaga, aemaise foi ma faamanuiaga mo le Kolisi. Na ma'ea le sauniga lotu, sosoo ai ma le toonai faale-aiga ma susuga ia Soti ma le faletua ma le Alii Pule faapea le Kolisi. Sa lagona lava le agaga faafetai i luma o le Atua i lenei aso, ina ua faamanuia mai le Tamā ia Soti mo le Koli-

si. E talitonu o le tapuaiga, o talosaga, ma faamanuiaga mai tamā ma tinā o le Ekalesia, e manuia ai faiva o le susuga i le Alii Pule, le vasega o faiaoga, faapea ma le nofo a suega i a'oa'o ma faletua seia oo lava i nai o matou fanau. Ia manuia le ālo atu mo le penesione i lau susuga Kerisiano Soti ma le faletua ia Laumata, ma i latou uma o le a penesione i lenei tausaga 2016. Faafetai le tautua, malo fai o le faiva.

Panama Pouono



Toe Faaolaola le Oso ma le Tiapula

O le amataga o le tausaga nei 2016, na toe lalagaina ai faiga maumaga a le Kolisi e ala i se finagalo o le Alii Pule, Sui Pule ma le aiga faiaoga. Na vaevaeina pa povi e fa (pa 7,8, 9, ma le 10) mo lea fuafuaga, ma sa matauina le naunau o aoao faapea le Alii Pule ma le aiga faiaoga, aua ua leva foi aso talu ona le toe faatinoina lenei vaega taua o le soifua aotauina. O le taimi nei ua soo lautalo toaga taitasi, e ui ina sa satia i le amataga i mea i tuaolo ta'aloa. O lea la ua malu le pa fou ma e faafetaia ai le Atua ina ua sologa manuia lenei faamoemoe. E silia ma le sefulu lima afe tiapula le toaga ua i ai nei, ma e avea ai lenei avanoa e momoli ai le faamalo ma le faafetai i le Alii Pule e tusa ma le tofa ua ae ina ia toe faia maumaga e tua i ai le Kolisi. E faafetai foi i le Komiti o Faatoaga; Dr. Vaitusi Nofoaiga, Latu Latai, ma Apineru Fasavalu ma aoao o le komiti, mo le galuega tele aua le malu puipua o mea toto a le Kolisi. Ia faamanuia le Atua i ia auaunaga taua.



College Main Office Burgled

The College Main office was struck twice through a series of carefully plotted burglaries during March and April. On Saturday 26th March 2016, the Principal's office was broken into as cash was stolen. The culprits left a mess behind, along with a screw driver and a small kitchen knife. The burglary was discovered when the Principal, Rev. Ma'afala Limā, visited his office and found his desk drawers on the floor. Police officers were notified, however, they were unable to find any leads.

Two weeks later on the 6th of April 2016, in the early hours of the morning, another break-in occurred. This time the culprits cut through the wire mesh of the Principal's office front window, removed a few louvers where they made their entry. They took away the Principal's laptop as well as hard drives containing vital College files. The incident was discovered by student wives who discovered a set of keys belonging to the office, inside the bathroom area as well as louvers placed neatly on the grass outside of the Principal's office. It is alleged that the culprits were unable to access the strong safe at the secretary's office, and headed to one of the students' house by the cricket pitch, where a hat alleged to belong to the thief was left behind. Police officers in charge of the case are continuing their investigation, but at this stage, no suspects were charged.

The College has taken these burglary incidents seriously as a result, with further security measures taken. Security patrols by students at night have been intensified. Meanwhile, students and families have been advised to give notice to the Principal and teachers when they have visitors entering the College Compound.

Maota Fou

O le vaiaso na te'a nei na faapaiaina ai nisi o maota fou o Matagaluega ma Pulega, ina ua a'e faiva o afioga i agai o tupu ma le aiga Salemalama, aua le fausiaina o maota, e autovaa mai ai i le Fono Tele.

O le Aso Tofi, 5 o Me 2016, sa faia ai le sauniga o le Umusaga o le **Maota o le Matagaluga a Kuiniselani i Saute**, na taitaiina e le Susuga i le alii Pule o le Kolisi i Malua, le susuga ia Maafala Lima FS. O lea Matagaluega, o loo i lalo o le taitaiga a Susuga i Toeaiina, o Tauaana Mataafa FT, ma Ionatana Faaiuso FT.



A o le Aso Toonai, 7 o Me 2016, na faapaiaina ma tatala ai le **Maota o le Pulega i Sini Sasa'e**, i le sauniga na taitaiina foi e le Pule o le Kolisi i Malua. O le Pulega lenei e i lalo o le taitaiga o le Susuga i le Toeaina ia Kolia Fiu Kolia FT.



E momoli le faamalo i le Matagaluega a Kuiniselani i Saute ma le Pulega Sini Sasa'e, mo galuega mae'ae'a i maota nei e lua, ma ia fai lava ma viiga o le Atua.

Ia avea nei maota, e fai ma fale e Afio ai le Alii!

Fa'amuli o le Eseta *Tausaga Muamua 2016*

E fa'a'iloa atu ma le agaga fa'aaloalo tele lenei ripoti mo le silafia i tulaga uma, ma fuafuaga aemaise o fa'atatau sa feagai ma le Vasega Tausaga Muamua 2016 i la latou fa'amuli.

E fa'aso o le fa'amuli, aso Tofi 24 Mati i le afiafi se'i o'o le aso Gafua 28 Mati 2016. O le fa'amuli sa ta'ita'i ai le Tamā Pule ma lona Faletua, fa'atasi ai ma le fesoasoani a le Susuga ia Solipo. O le tausiga ma le gaseseina o taumafataga sa fuafuaina lava e le laulau o le matou vasega, o le tapenaina o le Iupeli ma le fale Senetenari sa nafa lava ma faletua i lalo o le ta'ita'iga a le Faletua o le Pule ia Lalokava.

Na sologa lelei fuafuaga uma i fe'au ma galuega na feagai ma a'oa'o ma faletua. Leai se mea na fa'ale-tonu pe tauto'ai ai tapenaga, tu'u taimi mea uma ma talafeagai fo'i ma fa'atinoga. Sa fa'aauauina foi tiute masani fa'ale-kuka tumau o le fa'amamāina o le lapisi ma le fafagaina o mea fafaga a le Kolisi. Sa fa'atinoina foi faigalotu i taimi masani a'emaise o leoleoga i le leva o le afiafi.

Fa'afetai i le Atua mo le malosi ma ana fa'amanuiaga e tele i so'o se vaega. Manuia mea uma, lava le fa'asoa, leai seisi na gasegase pe fa'avaivai, fa'aiuina mea uma i le fiafia, manuia foi la matou Ta'ita'i fa'amuli i le Pule ma lona faletua, fa'apea fo'i le susuga ia Solipo.

"O mea uma ua lelei ma matagofie, ia ave lea e fai ma viiga o le Atua, ae tumau le fa'atauva'a ia i tatou".

TUSI MO LE SUEGA ULUFALE I

MALUA 2016

Feagaiga Tuai: Faamasino

Feagaiga Fou: Kalatia & Efeso



Mafutaga a Tina



IA MOTU LE PA UA ILOA.....

Fa'aipoipoga a le Kolisi:



**Faalata & Sarai
Leaumoana**

E faailoa atu ma le agaga fiafia, nisi o Aoao ua tuufaatasia ma a la manamea, e ala i le Faaipoipoga, lea na faataunuaina i le tuuaga umi o le vaitau o le Kerisimasi ma le Tausaga Fou 2015/16. O le susuga i le aoao faaiuso ia Faalata Leaumoana (Aukilani), na tuufaatasia ma le faletua ia Sarai, i le EFKS i Doonside, Sini, Ausetalia. Na faataunuaina lea faamoemoe i le aso 12 o Tesema 2015. Sa tuufaatasia foi e ala i le Faaipoipoga, le susuga i le aoao faaiuso ia Panapa Alafau (Falealili ma Safata) ma le faletua ia Tema, i le PIC i Ueligitone, Niu Sila. Sa faia lea



**Panapa & Tema
Alafau**

sauniga i le aso 16 o Ianuari, 2016. Ia manuia tele nei ulugalii fou, aua le feagai ai ma le soifua aotauina i le Kolisi.

Aufaigaluega galulue mo le Bachelor of Divinity BD:

Mo le silafia i le fa'afofoga'aga o le Ekalesia, e fiafia e fa'aailoa atu fo'i nisi o sui fa'aopoopo o lenei tausaga i le polokalame o le Bachelor of Divinity (BD). O susuga i fa'afeagaiga ia Efu Efu, Letaulau Pesaleli, fa'apea ma le susuga i le a'oa'o fa'au'u ia Vailele Lemalu. Malo le finau ma le tauata'i i nei sui auai o le polokalame.

Sootaga Faaauau a Kiribati Protestant Church ma le EFKS:

O loo faaauauina pea sootaga lelei ma le mafanafana a le Ekalesia Porotesano i Kiripati ma le EFKS, e ala i le auina mai o ana sikolasipi ina ia aoaoina i le Kolisi i Malua. E toalua aoao mai Kiripati o loo aotauina i le Kolisi i Malua, ina ia faalateleina le silafia i Mataupu Silisili ma le Tusi Paia. O Toantemam Ueanteiti ua faaipoipo, ma le aoao nofo toatasi o Wanikaie Wanikaie.



Toantemam Ueanteiti



Wanikaie Wanikaie

Pepe Fou:

O le tausaga nei 2016 sa faaopoopoina ai nisi alo poo oloa taua mai le Atua i le Kolisi Faafaifeau i Malua, e ala mai i le susuga i le faifeau faiaoga ia Visiesio Saga ma le faletua ia Analeta ma lo la alo ia Maravina. E le gata i lea, o le susuga i le a'oa'o ia Clarke Stowers ma le faletua ia Fofoga ma lo la alo ia Robert. E faapea foi le a'oa'o ia Panapa Jr. Panapa ma le faletua ia Fesuea'i ma lo la alo ia Grace. O le a'oa'o ia Sunita Nua ma le faletua ia Tuano'a ma lo la alo ia Herema. Ia faamanuia tele le Atua i le tausaga o meaalo-fa taua mai le Atua e ala i pepe fou.

Sui Usufono a le Kolisi

O le sui usufono a le Kolisi o lenei tausaga 2016, o le susuga i le faifeau faiaoga ia Dr. Vaitusi Nofoaiga. O le susuga foi ia Nofoaiga na saunia le pepa o le uluai aso o tualumaga o le Fono Tele, e faatatau i le manatu autu o le Fonotele: "Vaaiga i le Aga-ga." Manuia tele le usugafono!



I'ULEO O LE MALUAPAPA

Vaaiga i le Kolisi



Vaaiga i le Fono Tele



MAFUTAGA A'OA'O

O se oototoga lenei o galuega sa feagai ai ma le mafutaga a a'oa'o mo le kuata muamua. E iai galuega iloga e manatua ai pea lena kuata, e aofia ai le toe amataina o maumaga, faapea le toe fa'aleleia o lo'ilo'i. O le amataga o le tausaga na toe lalaga ai ma'umaga i le talaloa. Na va'aia le sagisagi fiafia o a'oa'o i lona fa'atinoga, auā ua tausagā fa'atoa toe lalaga lea o lenei atina'e. Na fai mea'ituā'olō ma fa'afitauli i lenei taumafaiga. Ae peita'i, e le i fa'avaivaiia ai le fa'amoemoe, ma o lo o fa'aauuina pea i le taimi nei. Na toe fa'aleleia foi lo'ilo'i o loo i tuāmaota o le Kolisi, ina ia malu puipua meafafaga i totonu o lo'ilo'i.

E momoli le fa'afetai i le Susuga i le Alii Pule ia Ma'afala Limā ma le faletua ia Lalokava, fa'apea le mamalu i faiaoga ma o latou faletua, e tusa ai ma le ta'ita'iga, ua fa'ai'uina ai i le manuia galuega o lenei kuata. E le fa'agaloina le tapua'iga a matua, aiga, nuu ma ekalesia. Faafetai tatalo. E mulia'i se faafetai i le mafutaga a aoao ma faletua mo galuega ua fa'atinoina, ia fai lea ma vi'iga o le Atua. Soifua

Melepone Isara & Rupī Apaola
(Peresetene & Failautusi)

TAALOGA MAFUTAGA A'OA'O

O le polokalame taalo o le kuata muamua, sa feagai aoao ma le soka, lakapi pa'i, ma le kirikiti. I le fa vaiaso muamua o le kuata, sa vaevaeina a'oa'o e pei ona masani ai i tausaga ua mavae, i 'au e lua, o le lanu Uliuli ma le lanu Pa'epa'e. Ona vasa'i lea mo ni vaiaso se tolu a o alo atu aoao i lana ta'amilosaga kirikiti. Ona toe fa'aauu ai lea ta'aloga soka ma le lakapi pa'i i vaiaso mulimuli. O le fa'ai'uina o le ta'amilosaga soka ma le lakapi pa'i, e tutusa le 'au Uliuli ma le Pa'epae. I le ta'amilosaga o le kirikiti e mae'a le kuata muamua, o lo o 'ūmia e le Samasama le talita o le ta'amilosaga.

O le aso ma le filiga o le aso ma le mataiga tila. Ae fa'apea se lagona ina ua fa'amavae atu i lē sa aveia ma Ta'ita'i Komiti i tausaga e tele ua mavae, le susuga i le faia'oga ia Peletisala Limā, ina ua vala'uina mo le galuega i Fairfield i Ausetalia. O susuga ia Taipisia Leilua ma Solipo Niulesa o le a tauaveina le taitaiga o taaloga.

Ma le faaaloalo lava,
Komiti o Ta'aloga

MALUAPAPA PRE-SCHOOL



Na amataina le aoga fa'ata'ita'i i le Aso 10, Fepuari 2015. E 12 alo tama'ita'i ae toa 10 alo tama na amataina le aoga. O fanau lava a faiaoga, a'oa'o ma faletua o lo'o a'otauina i le taimi nei i Malua ma o le aofa'iga o tamaiti e 22. O lo'o a'oa'oina i latou i le amio e tataua i le tamaitiiti e faavae i luga o le alofa ma le faaaloalo. O loo faataua foi le soifua maloloina, ma sa aga'i mai le ofisa o le soifua maloloina e siaki le fanau, i le lelei o le vaai, o le fa'alogo, aemaise o latou tino, i le ola tumamā.

Sa fa'atino foi e le fanau le tala o le Aso Maliu, ina ia lagona lelei e le fanau le tūua foi o lea aso i le ola tuputupu a'e. A'o le ātoaga lava o lenei āoga, ia ola

fiafia i latou i se si'os'omaga mamā ma maua atili ai e i latou le fiafia e mafuta ai i isi tamaiti i totonu o le aoga. O lo o ta'ita'iina lenei āoga e le faletua o le Alii Pule ia Lalokava Limā, ma le lagolagosua a faletua o faia'oga ia Lotu Latai, Mile Nofoaiga, Tanaria Kolia ma Herema Pouono. O lo'o fesoasoani ai fo'i ma faletua o a'oa'o. E momoli atu ai le fa'afetai i faletua o faiaoga sa tauaveina lenei kuata aemaise le lagolago malosī o faletua o a'oa'o ua ma'ea i le manuia. Tumau atu pea i le Atua le vi'iga e fa'avavau. vaega o le Kindy.



AOGA ASO SA I MALUA

Na amatalia galuega a le A'oga Aso Sa i le Aso Sa 14 Fepuari 2016. O le aufaigaluega o fa'ai'uso e to'aiva, ma faletua o fa'ai'uso e to'afitu, faatasi ai ma faletua o faiaoga e toasefulu. O le aofa'i o tamaiti e 110. O tapenaga o matā'upu e faia i po o Aso Faraile, a o le'i feiloai fa'atasi i le Aso Toonai, ma le susuga i le taitai o le Aoga Aso Sa ia Ma'afala Limā. O le fa'amoemoe e fefa'asoa'i ma fetufaa'i i fesoasoani e fa'aleleia ai tapenaga mo le Aso Sa. E faia foi i Aso To'onai uma ta'alogā a le fanau. Sa faatinoina foi le tala fa'atino o le Aso Maliu, sa fa'atinoina e le vasega fa'ai'uso ma ō latou faletua, ma nisi o le fanau. O le autu o le Aso Maliu mo lenei

tausaga; "Mo i Tatou".

O le kuata foi lenei na fa'amavae ai le Aoga Aso Sa ma le faletua o le faia'oga ia Michiko Limā, ina ua valaauina i laua ma le faifeau faiaoga ia Peletisala mo le galuega faafaifeau i Fairfield i Ausetalia. O le agaga fa'afetai i le Atua ona o galuega o lenei kuata. Fa'afetai i le Susuga ia Maafala ma le faletua ia Lalokava, fa'apea faletua o faia'oga i le fa'asoa ua fesoasoani mo le galuega. Fa'afetai fo'i i fa'ai'uso i le fa'amalolosi i le galuega o lenei kuata.

Soifua,

Timoteo Tapelu

(Failautusi Aoga Aso Sa – Kuata Muamua)



MAFUTAGA FALETUA

O se oototoga o polokalame a le mafutaga mo le tausaga 2016. O le aofaiga o faletua e 47: tausaga 1 (14); tausaga 2 (12); tausaga 3 (7); tausaga 4 (14). E 5 vaega e faasolo i ai mo kuata taitasi; Falesa, Fale Mafutaga, Aoga Faataitai, Faletusi, ma le Home Group. O Aso Lua o polokalame o meataulima (kolose, elei, lalagaina o ato tui, vaneina o laupapa elei ma su'isu'iga) ma le faamoemoe e faia faaaliga i faaiuga o kuata taitasi. O afiafi o Aso Lulu e faia ai tapuaiga e taitaia lava e faletua o faiaoga ma faletua o faaiuso. O faaiuga o masina taitasi e faatino ai polokalame faaleagaga - pesepesega, faaevagelia ma tala faatino mai le Tusi Paia. O loo aoaoina foi faletua i mataupu eseese i le Tusi Paia. O Aso Tofi o le aso taalo ma faamalosi tino i afiafi o Aso Lua taitasi. O

nisi o polokalame e auai ai faletua mo fanau a le Kolisi, mai le tausaga 5 (year 5) i aoaoga maululuga (*college & university*), e iai faitauga tusi (Samoan & English), study centre and specialised tutorials.

E faafetaia le faletua o le Alii Pule, Lalokava Limā faapea faletua o faiaoga mo le latou taitaiga o vaega taitasi o le mafutaga. Faafetai tele mo fautuaga faatina ma le onosai i le feagai ai ma tiute faataitai. Faamalo foi i faletua faaiuso ma faletua o vasega taitasi mo galuega faatino o lenei kuata.

Faamanuia tele le Atua i galuega ma aoaoga o lenei tausaga.

Ma lo'u faaaloalo lava,

Tupe Lealaitagomoa-Isara (faletua o le Peresitene)



Tagā Polo 2016

O le Aso Faraile 06/05/2016 na faataunu'uina ai le ta'aloga Tagā Polo e pei ona masani ai, i le va o le 'au a Malua ma le 'au malosi a susuga i Toeaiina ma le 'aufaigaluega mai Ausetalia. Ua lua tausaga sosoo o manumalo pea le au a Ausetalia ma o le ala foi lea na le faatamala ai tapenaga a le au a Malua i lenei tausaga.

Na amata lava lenei aso i le tatalo na saunia e le susuga i le Toeaina penesione malolo ia Peleti Toailoa, o le foi sa avea ma Kapeteni a Ausetalia i aso ua mavae. Na sosoo ai loa ma le malu taeao ona faagasolo ai loa lea o taaloga i lea aso.

E sefulu (10) au a Ausetalia ae sefulu ma le fa (14) au a Malua. O le sailia o le manumalo e faaoga ai au e sefulu aupito i lelei le taumafai. Na matua mataalia le taumafai o au uma sa auai. E ui lava ina naunau au uma i le manumalo, ae lei aveesea ai le tusaafia ma le avafatafata ao faagasolo ai faagatama i lea aso.

O le iuga la o le taaloga, na molimauina ai le see atu o le ipu i le 'au a Malua ua fai si umi o nonofo ma Ausetalia. Ua mau nei le ipu i Malua se'ia aulia le isi Fono Tele i le tausaga fou 2017.

Ao se fiatiaga tele foi i le Kapeteni a Malua ona o lea ua see mai le ipu i Malua ae o lona uluai tausaga foi lenei ua avea ai ma Kapeteni o le au.

O 'ai tu'ufa'atasia o le ta'aloga o loo fa'aalia i lalo, fa'atasi ai ma nai fa'ailoga sa saunia uma e le 'au pelē mai Ausetalia.

Faaiuga o le ta'aloga (au e sefulu aupito i lelei sikoa): Malua: 779; Ausetalia: 784

Fa'ailoga fa'apitoa o le ta'aloga:

Nearest to the Pin	Hole 2	Tavita Maliko (Malua)
Nearest to the Pin	Hole 6	Leai se isi
Nearest to the Pin	Hole 10	Taua'ana Mata'afa (Ausetalia)
Nearest to the Pin	Hole 16	Vaitusi Nofoa'iga (Malua)
Longest Drive	Age 50 years and above	Moe Tauti (Ausetalia)
Longest Drive	Age under 50 years	Fiti Semaia (Ausetalia)
Best Score	69	Esekia Peneueta ma Luapene Nepo (Malua)

Sa fai meaalofoa ai fo'i le 'au a Ausetalia mo le 'au a Malua, e le gata i polo ma tees, ae faapea ai foi ma le seleni. O le Aso Faraile 13/05/2016, sa faamoemoe e faia ai le taaloga i le va o le 'au a Malua ma le 'au a Niu Sila i Saute. E tusa ai ma le finagalo o Kapeteni o 'au e lua, ua fa'amutaina ai nei lea mafutaga ta'alo se'ia i ai se aso. Ae ui i lea, sa faataunu'uina lava le taaloga a Malua latou ma maua ai lava le mafutaga fiafia.

Momoli le fa'afetai i le tusa'afia o le 'au ta'alo mai Ausetalia, atoa ma le agalelei e ala i meaalofoa ua foaiina mo le 'au a Malua.

E faafetaia ai foi le lagolago a le Kamupani a le Uncle Johnnys, faapea ma le Bluesky Samoa.

E faapitoa ai le faafetai i le susuga Fata Ueligitone Malifa ma le Oceania Communications 2000 mo le saunia o le toniga a le au a Malua. Moomooga ia mafai ona faaauau ai pea lenei faiga paaga matagofie i le agaiga i le lumanai. Mo le au a Ausetalia, e le o toe mamao foi lena tausaga, ae mo le au a Malua, tumau ai pea le tusaafia. Manuia le usugāfono i lenei tausaga.



Maafala Limā & Peleti Toailoa



Fata Ueligitone Malifa | Media Strategies & Insights (PI)



Team Malua—2016 Champions



Esekia Peneueta & Luapene Nepo (Best Score)

Komiti o le Maluapapa

Aukilani Tuiai, Makesi Neemia, Visiesio Saga, Reupena Maulolo, Apineru Fasavalu, Panama Pouono, Brian Kolia, Segā Asafo, Leefu Pule

www.malua.edu.ws

© 2016